



Groupe parlementaire

Här Claude Wiseler
President vun der Deputéierte Chamber
19, um Krautmaart
L-1728 Lëtzebuerg

Lëtzebuerg, de 14. Abrëll 2025

Här President,

esou wéi d'Chambersreglement et virgesäit, bieden ech lech, dës parlamentaresch Fro un d'Madamm Verkéiersminister weiderzeleeden.

Esou wéi et am Artikel "*Sept Millions pour protéger les chauffeurs de bus transfrontaliers*" deen haut am Quotidien publizéiert gouf, heescht, hält d'Gewalt géint Buschauffere besonnesch op de grenziwwerschreidende Linne Richtung Frankräich säit Joren zou. Deementspriedend gëtt d'Installatioun vun de Sécherheetskabinen och op dëse sensibele Strecke konzentréiert. D'Gewerkschafte fuerderen iwwerdeems op besonnesch geféierleche Strecken och Sécherheetspersonal matfueren ze loossen. Déi selwecht Problematik hat ech iwwerdeems a menger parlamentarescher Fro Nummer 6943 aus der Legislaturperiod 2018 - 2023 thematiséiert.

An deem Zesammenhang géif ech der Madamm Verkéiersminister gär dës Froe stellen:

- 1) Kann d'Madamm Minister eng Tabell presentéieren, déi d'Fäll vun Iwwergrëff am ëffentlechen Transport vun 2022 - 2024 oplëscht an no verbalem a physische Fäll souwéi Vandalismus regroupéiert?
- 2) Ginn déi ëffentlech Institutiounen an der Groussregioun un de Käschte fir d'Ausrüstung vun de Busser mat Sécherheetskabinen bedeelegt? Falls net, firwat net?
- 3) Wéi steet d'Madamm Minister zu der Méiglechkeet, op besonnesch geféierleche Strecke Sécherheetspersonal an de Bussen anzesetzen? Géif d'Madamm Minister gegebenefalls eng Demande un déi zoustänneg ëffentlech Institutiounen an der Groussregioun stellen, fir se un den Zousazkäschen ze bedeelegen?
- 4) An der Äntwert op meng uewe genannte parlamentaresch Fro Nummer 6943 huet den deemolegen Här Verkéiersminister drop verwisen, datt den Tracé an den Horaire op eenzele Strecken an der franséischer Grenzregioun geännert goufen, fir op déi verännert Sécherheetslag ze reagéieren. Kann d'Madamm Minister den aktuelle Stand vun deene Moosname presentéieren?
- 5) An der Äntwert op meng uewe genannte parlamentaresch Fro Nummer 6943 huet den deemolegen Här Verkéiersminister drop verwisen, datt et dem Minister méiglech ass, eng Persoun, déi sech am ëffentlechen Transport donieft behëlt, den Zougang dozou während engem Zäitraum vu bis zu engem Joer ze verbidden. Kéint d'Madamm Minister sech virstellen am Fall vu Kierperverletzung géint Chaufferen, aner Passagéier a Vandalismus d'office vun där Moosnam Gebrauch ze maachen, fir e kloert Signal ze ginn, datt Gewalt am ëffentlechen Transport net toleréiert gëtt? Falls net, firwat net?

Mat déiwem Respekt,



Jeff Engelen
Deputéierten



LE GOUVERNEMENT
DU GRAND-DUCHÉ DE LUXEMBOURG
Ministère de la Mobilité
et des Travaux publics

**Äntwert vun der Madamm Yuriko Backes, Ministesch fir Mobilitéit an ëffentlech Aarbechten, op
d'parlamentaresch Fro n° 2219 vum 14. Abrëll 2025 vum honorablen Deputéierten Jeff Engelen,
Violence envers les chauffeurs de bus transfrontaliers**

Den éierwäerten Deputéierte gräift d'Thema vun der Sécherheet am ëffentlechen Transport op fir e puer Froen ze stellen, déi an der virechter Legislaturperiod och an der Fro Nummer 6943 an an der Fro Nummer 6040 thematiséiert gouf.

1. Kann d'Madamm Minister eng Tabell presentéieren, déi d'Fäll vun Iwwergrëff am ëffentlechen Transport vun 2022 – 2024 oplëscht an no verbaalem a physische Fäll souwéi Vandalismus regruppéiert?

D'CFL-Agentinnen an Agenten hunn d'Méiglechkeet d'Deklaratiounen zanter 2024 iwwer eng App ze maachen. Dës App gouf och elo rezent den anere Bedreiwer zur Verfügung gestallt.

Et ass wichteg ze ënnersträichen, datt opgrond vun der Digitaliséierung vun den interne Rapporten, d'Deklaratiounsprozedur vereinfacht gouf, an doduerch d'Unzuel vun de deklariéierte Fäll statistesch beaflosst kéint sinn.

Iwwergrëff op Agentinnen an Agenten pro Operateur


Entreprises	AVL			CFL			Luxtram			RGTR			TICE		
Types agressions	2022	2023	2024	2022	2023	2024	2022	2023	2024	2022	2023	2024	2022	2023	2024
Agressions - Harcèlement (moral)		1			3	1	1					1	2		1
Agressions - Harcèlement (sexuel)		1		2	4	2									
Agressions physiques	2							7		2					
Agressions physiques - Atteinte corporelle	1	1	1	12	5	9		1	2	2		2	1		
Agressions physiques - coups avec blessure				5	7	9			1	3	6	3		2	
Agressions physiques - coups sans blessure		1	4	10	10	14			2	3	10	2		1	4
Agressions physiques - Crachat			1	9	5	23			4	1	2	2		2	2
Agressions physiques - Rixe entre tierces personnes			1										1		
Agressions verbales - Insultes	16	27	63	124	145	140	6	1	19	16	41	35	10	16	30
Agressions verbales - Menaces	2	4	4	6	10	17	2		1	1	4	3	1	2	2
Agressions verbales - Menaces à l'appui d'un objet					3		1					1			
Autres agressions						1		8	2			1			
Total	21	35	74	168	192	216	10	17	31	28	64	51	13	23	39



Iwwergrëff op Agentinnen an Agente pro Typ




Agressions dont été victimes des agents des transports publics



Gemelte Fäll vu Vandalismus pro Joer



Actes de vandalisme



2. Ginn déi ëffentlech Institutiounen an der Groussregioun un de Käsche fir d'Ausrüstung vun de Busser mat Sécherheetskabinne bedeelegt? Falls net, firwat net?

Vu datt d'Busser zu engem ganz groussen Undeel um Lëtzebuerger Territoire fueren, ginn d'Käsche vun den nationalen a grenzüberschreitenden RGTR Buslinien integral vum Mobilitéitsministère gedroen, dat begräift och d'Sécherheetskabinne. All neie Bus muss eng Schutzwand oder Kabinn hunn. Eng Bedeelegung vun den ëffentlechen Institutiounen am Ausland ass, genee esou wéi eng Bedeelegung vun eise Gemengen zu Lëtzebuerg, net virgesinn.



3. *Wéi steet d'Madamm Minister zu der Méiglechkeet, op besonnesch geféierleche Strecke Sécherheetspersonal an de Bussen anzesetzen? Géif d'Madamm Minister gegebenenfalls eng Demande un déi zoustänneg ëffentlech Institutiounen an der Groussregioun stellen, fir se un den Zousazkäschten ze bedeelegen?*

An der Äntwert vun der parlamentarescher Fro Nr. 6040¹ vum 7. Abrëll 2022 zum Thema vun der Sécherheet vu Buschaufferinnen a Buschauffeur huet mäi Virgänger scho ganz gutt erkläert, wisou Begleetpersounen am Bus net sënnvoll sinn. Dorun huet sech näischt geännert.

4. *An der Äntwert op meng uewe genannte parlamentaresch Fro Nummer 6943 huet den deemolegen Här Verkéiersminister drop verwisen, datt den Tracé an den Horaire op eenzele Strecken an der franséischer Grenzregioun geännert goufen, fir op déi verännert Sécherheetslag ze reagéieren. Kann d'Madamm Minister den aktuelle Stand vun deene Moosname presentéieren?*

Am Dezember 2022 sinn d'Tracée vun de Linne 703 a 732 ugepasst ginn, fir d'Sécherheet vun all de Bedeelegten ze assuréieren. Aktuell ass net virgesi weider Mesuren ze applizéieren.

5. *An der Äntwert op meng uewe genannte parlamentaresch Fro Nummer 6943 huet den deemolegen Här Verkéiersminister drop verwisen, datt et dem Minister méiglech ass, eng Persoun, déi sech am ëffentlechen Transport donieft behëlt, den Zougang dozou während engem Zäitraum vu bis zu engem Joer ze verbidden. Kéint d'Madamm Minister sech virstellen am Fall vu Kierperverletzung géint Chaufferen, aner Passagéier a Vandalismus d'office vun där Moosnam Gebrauch ze maachen, fir e kloert Signal ze ginn, datt Gewalt am ëffentlechen Transport net toleréiert gëtt? Falls net, firwat net?*

Esoubal de Ministère iwwer Virfäll vu verbalen Aggressiounen, Kierperverletzung géint d'Personal oder aner Passagéierinnen a Passagéier, Vandalismus, o.ä. vum Bedreier informéiert gëtt, gëtt den Dossier analyséiert an et kann uschléissend ee Verbuet ausgeschwat ginn.

Dës Prozedur, inklusiv der Méiglechkeet vun der beschëllegter Persoun sech ze verteidegen, wéi et an engem demokratesche Rechtsstaat üblech ass, ass am Gesetz vum 19. Juni 2009² iwwer d'Sécherheet am ëffentlechen Transport beschriwwen.

Lëtzebuerg, de 15. Mee 2025
D'Ministesch fir Mobilitéit an ëffentlech Aarbechten
(s.) Yuriko Backes

¹ <https://wdocs-pub.chd.lu/docs/exped/0129/188/259881.pdf>

² <https://legilux.public.lu/eli/etat/leg/loi/2009/06/19/n3/jo>